

ARUBA A PERDE UN GRAN PERIODISTA

Awe pa su familia, coleganan y medionan di comunicacion ta un dia tristo, hopi tristo mes.

Awe Emiliano "Ramiro" Tromp, ta ser hiba pa su ultimo lugar di sosiego.

E esposo fiel cu no a haya oportunidad di braza su "Mami" Myrna, ni pa scucha: "Papi, danki pa felicidad cu bo a brindami".

Myrlene y Ramphis, su "prendanan" no a haya oportunidad di sunchi nan "Papi" prome cu el a cera wowo.

Su coleganan, principalmente e asina yama "Ouwe Garde" a ser sorprendi cu su baymento, sin por a demostre e aprecio y cariño cu nan tin pe.

Aruba a perde aki un di su periodistanan mas stima, mas aprecia, mas respeta y mas admira.

Desde su periodo cu Arubaanse Corant y Beurs en Nieuwsberichten den añanan 60, y pasando un temporada na Prome na Savaneta, prome cu el a pasa pa fotografo deportivo y despues redactor di amigoe, "Ramiro Tromp" tabata un di e periodistanan mas respeta di Aruba, no solamente den seno periodistico, pero tambe den senonan gubernamental, comercial, deportivo y social.

Un periodista cu **NUNCA** a busca pa ta den publicidad, y casi nunca a mire tampoco den publicidad.

Ramiro tabata dedica na su trabao, cu un seriedad y responsabilidad enorme, cu masha poco ta mira awe cerca coleganan.

Un homber cu a sacrifica su familia na masha hopi ocasion pa cumpli cu su trabao, y na mes momento un homber cu a sacrifica hopi di placernan pa cumpli cu su responsabilidad di familia.

Durante e mas di 30 aña cu mi a conoce Ramiro, **NUNCA** mi a mira e "cabayero" aki hisa voz. Semper e tabata keto, tranquil bao di tur circunstancia, serio y na mes momento cu un toque di humor sorprendente.

Esaki no ta verdad tampoco. Na dos ocasion mi a mire cunsumi, pero manteniendo su postura di homber tranquil.

Na principio di añanan 80 cu un cumbre arubiano-anti-yano- hulandes a tuma lugar y prensa a wordo invita pa 4 or na un hotel pa informacion encuanto e cumbre aki. 4.20 or, un ministro a bin bisa cu mester warda poco mas pasobra awor ta bay prepara pa e conferencia y esnan cu ta interesa por spera te 5 or cu lo cuminza.

Ramiro su cara a trek ora e ministro a bira lomba bay, y a indica cu si **no tin respet pa prensa**, e no por keda y a bira bay cu mayoria di coleganan su tras.

Na un otro conferencia na un otro hotel, prensa a wordo yama pa mainta 10 or pa asisti na un conferencia di prensa.

Tabata 10 pasa di 10 cu personahenan a laga sa cu mester warda un cuarto di ora mas pasobra nan ta sperando riba Tele Aruba.

Aki Ramiro a laga sa cu "si Tele Aruba ta mas importante pa e hotel cu e medionan presente y e percura pa nan ta na ora, e hotel por tene su conferencia di prensa cu Tele Aruba numa," y tur hende a bira pa bay cu Ramiro, di manera cu e conferencia a cuminza mes ora sin Tele Aruba.



Ramiro ta un di e poco periodistanan cu no ta sali cu taperecorder pa cubri eventonan y cubri conferencianan. Semper e tabata cu sea su bloknot of pida papel dobla den 4 riba cual e tabata haci su anotacionnan.

Lo admirable di Ramiro tabata cu semper bo por a conta riba su relatonan, y si e tin un duda, e relato no ta aparece publica. Ramiro tabata "Sr. Corecto" na prome lugar cu su informacionnan.

Un colega cu ki ora di dia of anochi bo yame, semper e ta cla pa colabora sin pensa cu bo ta di "concurencia".

Ramiro, "Jacky" manera hopi ta yame tabata amante di baseball.

Desde su juventud e tabata gran admirador di Jacky Robinson y di su pasion pa tur cos cu tabata Jacky Robinson, a bini tambe e apodo "Jacky" cu el a carga te fin di su bida.

El a milita hopi aña den organizacion di **Aruba Little League** di nos isla, y awe por bisa cu e ta un di esnan hunto cu Sr. Milo Croes, cu a yuda pone e fundeshi pa e deporte aki na Aruba tambe.

Papiando di Sr. Milo Croes, mes ora mi pensamiento ta pasa tambe riba Carnaval.

Hopi aña Ramiro tabata un di e colaboradornan grandi di **Stichting Arubaanse Carnaval** y forma parti di e fundacion aki.

Ramiro tabata secretario di **Aruba Press Club**, tempo cu e club di prensa tabata e orguyo di cada periodista riba Aruba. Tempo cu "colegialidad" tabata reina cerca cada miembro di prensa riba nos isla y e persona di contacto pa loka te di mas chiquito te di mas grandi, semper tabata "Ramiro Tromp".

No tin un bishita di miembronan di familia real na Aruba cu e no a cubri. No tin un dignatario di exterior cu a bini Aruba sin cu e persona aki a

ser capta pa camera di Ramiro, of sin cu Ramiro a atende nan conferencianan of entrevista nan.

No tabata tin un sucedido riba nos isla sin cu Ramiro tabata eyan. Actuando como fotografo of como redactor, semper por a mire cu su camera, "su man drechi di trabao" colga na garganta.

Ramiro tabata un di e "masha poco" periodistanan Arubiano cu por a domina e "idioma periodistico hulandes" manera qualquier hulandes studia den e ramo aki.

un periodista cu apesar di tanto experiencia semper a bisa: "Tur dia mi ta siña mas y mas den e trabao aki".

Un colega admirable, un esposo ehemplar, un tata inigualable, un amigo grandi di Aruba, a laga nos.

Un personaher cu **NUNCA** a ricibi e honor cu el a merece durante su bida y durante su trabao pa e isla aki.

Un Arubiano cu a merece un **RECONOCIMIENTO**, no awor cu e no tey mas, pero hopi aña pasa, y cu no a biba pa siquiera por a goza di su prome "envelop" di pension cu e por a bisa: "a bira tempo pa mi sosega".

Indudablemente, e golpi mas grandi ta pa su "Mami" y su dos "joy-anan", y despues, e "sla" ta pa mundo periodistico di Aruba (y di Antiyas Hulandes, unda e ta masha admira y aprecia tambe).

Awe nos ta despedi di "Emiliano", "Ramiro", "Jacky", "Papi", pero cu un cos sigur, y esey ta cu e lo semper keda "bibo" den memoria di tur esnan cu a conoce.

"Ramiro, sosega na paz".

Juby

TA BENDE

Lote di palu di Ceda (1500 W.V.) Pa Afl:5.250,=. Pa mas informacion - 823194 (parti mainta) Druivenstraat # 8

Ding Dong
Eurokids



elefanten

Ruime sortering Europese kinder - schoenen - sandalen - kedsen - slippers - sportschoenen met ventilatie maar 18 t/m 38. Leuke kleding voor baby's - meisjes - jongens van 0 t/m 10 jaar. Zwemkleding - ondergoed - pyama's en alle kleuren sokken. Openingstijden: maandag 14:30 - 18:30 uur, dinsdag t/m vrijdag 9:30 - 12:30 en 14:30 - 18:30 uur, zaterdag 9:30 - 18:30 (nonstop). Fergusonstraat #57-C (Dakota) Tel: 837639

Renobacion Carismatico Catolico cu Seminario

ORANJESTAD (AAN): Cuminsando Dialuna 27 di April, pa cinco dialuna tras di otro Renobacion Carismatico Catolico Aruba lo conduci e Seminario di Cremento titula "Bibo den Spiritu" for di 7'or y mei te cu 9'or di anochi na Centro Pastoral na Santa Cruz.

Temanan cu ta ser presenta den e seminario aki ta: Donnan di Spiritu Santo, Palabra di Dios, Biba manera Cristo, E Curpa di Cristo y E Yamada pa Proclama.

E seminario ta habri pa tur esnan cu a pasa e seminaronan "Bida den Spiritu" y "Naci di Spiritu" promer cu Januari 1998.

Inscripcion pa esnan cu ta pertenece na un Grupo di

Oracion ta tuma lugar via nan Guia di Grupo. Esnan cu no ta pertenece na un Grupo di Oracion por inscribi door di yega na contacto cu un di e siguiente personanan; Lucila (Chila) Croes-Fleming tel.

857368, Mina Moore tel.824282, Elias Fingal tel. 870299 of Pader Wijbe Fransen na Centro Pastoral na Santa Cruz tel.858378.

Inscripcion ta sera dia 7 di April 1998.

Mañan tin reunion publico: No tin cas habri awe na school scucha nos

ORANJESTAD (AAN) -- For di School Scucha Nos redaccion di DIARIO a worde pidi pa publica lo siguiente: Awe no tin cas habri pa publico na School Scucha Nos,

pero tin un reunion publico riba diasabra, es decir mañan. Diabierna tin un reunion priva, specialmente pa mayor y algun invitado, special...